

UMS terap ilmu teknologi digital ekopelancongan kepada komuniti

UB 14.06.2024 P.08

KOTA KINABALU: Sekumpulan pelajar Fakulti Perhutanan Tropika (FPT) Universiti Malaysia Sabah (UMS) mendekati komuniti Kampung Seri Serbang Bongawan, Papar, bagi memperkenalkan kemudahan teknologi digital dalam industri ekopelancongan.

Lima pelajar yang dikenali sebagai kumpulan Reckers itu berkongsi tentang penggunaan teknologi digital dan pengendalian media sosial dalam memajukan sektor ekopelancongan di pusat pelancongan Kalimapat Enterprise.

Mentor program, Awang Ahmad Mohd Yunus, berkata program bagi memenuhi salah satu tugas yang harus dilakukan oleh kumpulan berkenaan dalam Pertandingan Impact Digital with Community Tourism (IDCT) 2023 anjuran Universiti Malaysia Sarawak (UNIMAS).

Katanya, program tersebut juga antara lain membantu komuniti mempromosikan destinasi pelancongan melalui penggunaan teknologi digital.

"Pertandingan IDCT 2023 disertai oleh institusi pengajian tinggi di Sabah dan Sarawak, dan UMS tidak terkecuali.

"Salah satu syarat pertandingan ini adalah dengan mengadakan aktiviti bersama komuniti," katanya.



TERIMA KASIH: Maria (tiga kanan) menyerahkan cenderamata kepada Pengurus Kalimapat Enterprise, Kabul Yamin Kassim.

Justeru, pihaknya memilih pusat pelancongan Kalimapat Enterprise untuk program pemindahan ilmu kali ini.

Dengan adanya kerjasama antara universiti, komuniti dan industri, program seumpama itu dapat meningkatkan potensi aktiviti pelancongan sekali gus meningkatkan pendapatan komuniti tempatan.

"Promosi destinasi pelancongan dengan menggunakan platform digital dapat menarik lebih ramai pelancong serta memperkembangkan peluang sedia ada untuk terus meningkatkan bilangan pelancong ke tempat ini," ujarnya.

Sementara itu, Ketua Kumpulan Reckers, Mohd Syahrul Faiq Mohamad berkata sejumlah RM6,000 disalurkan oleh Kementerian Pendidikan Tinggi

(KPT) untuk pelaksanaan program tersebut bersama komuniti.

Pertandingan akhir IDCT 2023 akan diadakan pada bulan Ogos nanti di Kuching Sarawak.

"Kami berharap kolaborasi antara Kalimapat Enterprise, Reckers dan semua pihak yang terlibat dalam program ini menjadi contoh bagaimana kerjasama antara universiti-komuniti-industri dapat membawa kebaikan kepada semua pihak.

"Harapan kami agar program ini dapat menjadi inspirasi bagi semua peserta untuk terus menerapkan nilai-nilai kerjasama dan inovasi dalam kehidupan seharian," katanya.

Hadir sama Timbalan Dekan (Hal Ehwal Pelajar) FPT, Profesor Dr. Maria Lourdes T. Lardizabal.